



## **Pareser ba Komisaun B Parlamentu Nasional kona-ba Prioridade sira ba Setor Defeza, Seguransa no Negósiu Estranjeiru iha Proposta Lei OJE 2024**

**Mahein Nia Lian Nú. 158**

**9 Outubru 2023**



*Photo: TATOLI-Agência Noticiosa de Timor-Leste*

**Fundasaun Mahein (FM)**  
**Website: [www.fundasaunmahein.org](http://www.fundasaunmahein.org)**  
**2023**

## Konteúdu sira

Introdusaun	2
Ministériu Defeza no F-FDTL	2
Ministériu Interior no PNTL	4
Servisu Nasional Intelijênsia	6
Polísia Sientífika Investigasaun Kriminal	6
Ministériu Negósiu Estranjeiru no Kooperasaun	7
Rekomendasaun	8
Bibliografia	9

## Introdusaun

Iha loron 29 Agostu 2023 Konsellu Ministru aprova kalendáriu preparasaun Orsamentu Jeral Estadu (OJE) 2024 ne'ebé apresenta hosi Ministra Finansa.<sup>1</sup> Iha loron 12 Setembru 2023 Governu hahu Jornada Orsamentais 2024<sup>2</sup> no Fundasaun Mahein (FM) simu konvite hosi Governo partisipa iha reuniaun ne'e. Tuir kalendáriu ne'ebé aprova ona iha Konsellu Ministru, Proposta Lei OJE 2024 Governu sei hato'o ba Parlamentu Nasional iha loron 15 Novembru 2023<sup>3</sup>.

Nune'e, iha setor defeza, seguransa no negósiu estranjeiru nian, FM hakarak partilla observasaun balu ba Parlamentu Nasional no Governu kona-ba prioridade sira ne'ebé presiza konsidera iha OJE 2024. Liu-liu prioridade sira ba instituisaun sira hanesan Ministériu Defeza, FALINTIL-Força de Defesa Timor-Leste (F-FDTL), Ministériu Interior, Polícia Nacional de Timor-Leste (PNTL), Serviço Nacional de Inteligência (SNI), Polícia Científica de Investigação Criminal (PCIC) no Ministério Negócio Estrangeiro e Cooperação (MNEC). Iha âmbito ida ne'e, FM hato'o ka apresenta ona pareser ida ne'e ba Komisaun B<sup>4</sup> Parlamentu Nasional liu hosi audiênsia enkontru FM ho Komisaun B iha loron 20 Setembru 2023.

## Ministériu Defeza no F-FDTL

Atu atinji objetivu estratéjiku sira iha setor defeza nian ne'ebé define iha Programa IX Governu Konstitusional. Ba tinan 2024 FM hakarak propoem atividade sira ne'ebé ami konsidera estratéjiku tebes no tuir ami nia observasaun haree katak sei bele dudu dezvoltimentu setor defeza no salvaguarda interese estratéjiku Timor-Leste nian. Tuir Programa IX Governu Konstitusional nian ba setor defeza, hosi objetivu estratéjiku sira ne'ebé Governu hakarak alkansa iha tinan lima mai, objetivu prinsipal ida maka:

“Revee no atualiza Estudu Estratéjiku Forsa-2020 no defini fali planu ba dezvoltimentu no konsolidasaun ba Forsa Armada, iha buat ne'ebé presiza to'o estabelese dokumentu estruturante sira ba Planeamentu Estratéjiku Defeza no Militar”<sup>5</sup>.

Política ambisiozu ida ne'e pública iha tinan 2007 bolu naran Estudu Estratéjiku Forsa 2020. Iha ne'ebé estudu ne'e nu'udar política ba defeza nasional no planu dezvoltimentu ba F-FDTL. Iha períodu implementasaun Estudu Estratéjiku Forsa 2020, maske nia konteúdu balu la iha ona relevânsia, liu-liu mudansa estratéjiku iha rejiaun no mundu nomos ameasa no risku sira ba Timor-Leste. Maibe Governu komu-metin deit planu ne'e no la halo avaliaun ba ninia

---

<sup>1</sup> Presidencia Konsellu Ministru (2023). *Sorumutuk Konsellu Ministrus nian iha loron 29 fulan-agostu tinan 2023*. Asesu iha loron 12 Setembru 2023 no disponivel iha: <http://timor-leste.gov.tl/?p=33720&lang=tp>

<sup>2</sup> Jornada Orsamentais tinan 2024. Asesu iha loron 12 Setembru 2023. Disponivel iha: <http://timor-leste.gov.tl/?p=33999&lang=tp>

<sup>3</sup> Presidencia Konsellu Ministru (2023). *Sorumutuk Konsellu Ministrus nian iha loron 29 fulan-agostu tinan 2023*. Asesu iha loron 12 Setembru 2023 no disponivel iha: <http://timor-leste.gov.tl/?p=33720&lang=tp>

<sup>4</sup> Comissão ne'ebe trata assunto defeza, segurança, negócio estrangeiro e cooperação.

<sup>5</sup> Programa IX Governu Konstitusional. Asesu iha loron 12 Setembru 2023. Disponivel iha ne'e: <http://timor-leste.gov.tl/wp-content/uploads/2023/07/TT-2023-07-19-Programa-IX-Governo.pdf>

implementasaun to'o tinan 2020. Portantu mehi ne'ebé ass maibe kapasidade financeiru la to'o hodi sustenta ninia implementasaun.

Iha relatóriu sira dahuluk liu FM rekomenda ona katak Governu presiza halo revizaun ba Estudo Força 2020 no Gabinete Força 2020 ne'ebé destaka iha Ministériu Defeza la'os haree deit ba ninia implementasaun maibe presiza mos halo avaliasaun ba estudu ne'e rasik kona-ba ninia relevânsia no tenke reflète ba kbi'it orsamentu Estadu nian hodi implementa. Se lae dokumentu ambisiozu ida ne'e ho mehi ne'ebé ass maibe mokit iha implementasaun<sup>6</sup>. Tamba ne'e FM aseita no estudu ida ne'e tenke sai prioridade iha tinan 2024, ami sujere halo revizaun no atualiza estudu ne'e hodi defini fila-fali polítika ba defeza nasional no planu desenvolvimentu no konsolidasaun ba Forsa Armada.

Hosi polítika temi iha leten ne'e nune'e hasa'e kbi'it Komponente Naval F-FDTL nian ba iha defeza, vijilânsia, kontrolu no fiskalizaun ba atividade marítima no portuária iha âmbito Sistema Autoridade Marítima Timor-Leste. Liu-liu vijilânsia no kontrolu iha parte tasi-mane Timor-Leste nian hodi prevene atividade ilegal sira hanesan peska ilegal. Iha ne'ebé tuir relatóriu hosi Ministériu Agrikultura no Peska iha tinan 2022 kada tinan Timor-Leste lakon mais-menos US\$ 300 milloens ba leten hosi atividade peska ilegal<sup>7</sup>.

FM mos sujere ba Ministériu Defeza kontinua fó treinamentu no hadi'a kapasidade Forsa Armada atu fó apoiu ba populasaun sivil, liu-liu iha tempu dezastre naturais no kazu emerjênsia sira seluk, iha âmbito sistema integradu seguransa nasional nian. Inundasaun tinan 2021 ba kotuk no Covid-19 fó lisaun importante ida, liu-liu envolve Forsa Armada iha situsaun sira ne'ebé povu no Nasaun enfrenta hodi fó tulun ba populasaun sira iha kazu dezastre naturais no krize saúde pública. Hodi alkansa ida ne'e, Governu tenke promove mos Komponente Apoiu Aéreo, la'os partisipa deit iha defeza militar país nian no tau-matan ba espasu aéreu nasional maibe partisipa mos iha misoens umanitária hodi apoia populasaun sivil<sup>8</sup>.

## **Ministériu Interior no PNTL**

Programa IX Governu Konstitusional nian ba setor seguransa interna, objetivu estratéjiku sira ne'ebé Governu hakarak alkansa iha tinan lima mai, objetivu prinsipal ida maka:

“Avalia, revee no atualiza Planu Estratéjiku Seguransa Interna 2030, atu nune'e bele ajusta ho dezafiu atual ka ohin-loron nian, iha setor seguransa interna no protesau sivil”<sup>9</sup>.

---

<sup>6</sup> Fundasaun Mahein (2017). Política ba Setor Segurança Seidauk sai Prioridade iha Timor-Leste: rekomendasaun ida ba kandidatu Presidente República no partidu polítiku sira iha Eleisaun Jeral 2017. Asesu iha loron 29 Setembru 2023. Disponivel iha ne'e: <https://www.fundasaunmahein.org/wp-content/uploads/2017/02/MNL-119-Prioridade-Politika-ba-Setor-Seguransa-022017-PDF-1.pdf>

<sup>7</sup> Relatório Ministério Agrikultura no Peska 2023. Asesu iha loron 2 Outurbo 2023. Dispínivel iha ne'e: <https://tatoli.tl/2023/08/25/2018-2021-tl-lakon-ikan-maizmenus-388-1720-tonelada/>

<sup>8</sup> Programa IX Governu Konstitusional. Asesu iha loron 12 Setembru 2023. Disponivel iha ne'e: <http://timor-leste.gov.tl/wp-content/uploads/2023/07/TT-2023-07-19-Programa-IX-Governo.pdf>

<sup>9</sup> Ibid.

Tuir FM nia monitorizasaun implementasaun ba Planu Estratéjiku Seguransa Interna (PESI) 2030 to'o ona Faze III Hametin Baze ba Paz no Estabilidade (2021-2025). Maibe IX Governu Konstitusional temi iha nia programa katak “durante tinan 6 ikus ne'e nu'udar períodu estagnasaun” tamba ne'e nesesitya duni halo avaliaun ba implementasaun PESI 2030. Nune'e mos reeve hodi kontektualiza PESI ba realidade foun ne'ebé Nasaun hasoru iha âmbito seguransa interna no instituisaun seguransa nia desenvolvimentu.

Iha tinan 2024 aleinde revizaun ba PESI 2030, ami mos sujere Ministériu Interior tau mos prioridade ba elaborasaun ba Política Seguransa Nasional ne'ebé lolos halo ona iha Faze I no II implementasaun PESI 2030. Tambasa Política Seguransa Nasional importante? Tamba Política Seguransa Nasional hanesan planu, estratéjia, konseitu ka doutrina no dezempeña papel importante ida iha tempu agora no futuro, liu-liu identifika interese sira primordial Nasaun nian no estabese liña orientasaun sira hodi hatan ba ameasa, risku no oportunidade sira ba Nasaun. Normalmente, Política Seguransa Nasional ninia hirarkia superior liu política seguransa sira seluk hanesan doutrina militar, estratéjia ba seguransa interna no sira seluk ne'ebé trata kestaun sira seguransa iha perspetiva instituisaun ka ajênsia espesifika ruma nian. Nune'e mos Política Seguransa Nasional diferente hosi política sira seluk tamba ninia objetu, portantu liga ho ameasa sira hosi rai laran ho rai liur<sup>10</sup>.

FM sujere iha tinan 2024 Governu preziza kontinua tau prioridade ba Estudu Estratéjiku ba PNTL hanesan temi ona iha PESI 2030. Iha elaborasaun estudu ne'e nian Polisia Komunitária tenke sai nafain filozofia no estratéjia polisiamentu PNTL nian. Nomos polisiamentu komunitária implementa iha nível hotu-hotu unidade, servisu no departamentu PNTL nian. Hosi Estudu estratéjiku PNTL nian introduz nafatin VIP (vizibilidade, Involvimentu no profesionalismu) sai nu'udar doutrina polisial no kaer metin nafatin ba ninia filozofia. Nune'e PNTL vizível iha fatin hotu-hotu, envolve comunidade iha asaun sira polisial nian no hatan ho profesional.

Nune'e mos Governu preziza kontinua fó formasaun ba membru PNTL iha área violênsia bazeia ba jêneru nune'e membru PNTL sira tenke sensível ba asuntu violênsia bazeia ba jênero. FM mos sujere iha tinan 2024 kontinua promove polisiamentu komunitária iha prevensaun ba krime no vizível iha comunidade liu hosi atividade sira vizita uma ba uma, enkontru regular ho autoridade lokal no comunidade sira. Nune'e mos patrullamentu hosi unidade no servisu sira PNTL nian iha estrada públiku, fronteira terrestre no tasi hodi prevene hahalok sira ne'ebé potênsia mosu krime no atividade kontrabandu sira ne'ebé liu hosi fronteira rai maran no tasi.

Ami mos rekomenda reforsa nafatin Departamentu Tranzitu no Seguransa Rodoviária iha nível nasional no munisipal kontinua vizível hodi implementa Kódigu Estrada hodi prevene asidente trafiku no violasaun sira ba Kódigu Estrada bainhira utiliza motorizada ka kareta. Tuir relatóriu husi PNTL iha tinan 5 ikus ne'e fator ne'ebé kontribui ba asidente trafiku ne'ebé aumenta maka'as

---

<sup>10</sup> Fundasaun Mahein (2017). Política ba Setor Segurança Seidauk sai Prioridade iha Timor-Leste: rekomendasaun ida ba kandidatu Presidente República no partidu polítiku sira iha Eleisaun Jeral 2017. Asesu iha loron 29 Setembru 2023. Disponivel iha ne'e: <https://www.fundasaunmahein.org/wp-content/uploads/2017/02/MNL-119-Prioridade-Politika-ba-Setor-Seguransa-022017-PDF-1.pdf>

iha Timor-Leste 90% mai hosi fator ema ka hosi hahalok ema nian ne'ebé la kumpri ba regras, lano no halai ho velocidade ne'ebé maka'as.

Nune'e mos Governu preziza reforsa servisu informasaun polísia nian ka intelijênsia kriminal liu husi Departamentu Informasaun Polísia (DIP). Liu-liu rekolla no analiza informasaun iha âmbito informasaun kriminal no seguransa interna. Inklui kapasita no mellora kapasidade ajente polísia iha matéria investigasaun kriminal ne'ebé nia natureza kompleksu no organizadu.

### **Servisu Nasional Intelijênsia**

Tuir FM nia monitorizasaun iha tinan 2022 no 2023 VIII Governu Konstitusional aprova ona kadru legal importante rua ba SNI, revizaun ba orgânika no estatutu pesoal SNI. Maibe Prezidente Repúblika veta ona iha fulan Abril 2023. Maske nune'e, IX Governu Konstitusional konsidera hikas fali no tau hanesan programa prioridade ba tinan lima<sup>11</sup>.

FM deskreve tiha ona iha artigu dahuluk ne'ebé publika iha 19 Abril 2023 katak revizaun ba kadru legal no kriasaun estatutu pesoal nu'udar pasu pozitivu hodi hametin profesionalizmu SNI<sup>12</sup>. Nune'e mos hadi'a dezafiu ohin loran nian, liu-liu iha espasu sibernétiku nian tenke investe mos iha intelijênsia sibernética, liu-liu iha mundu globalizadu ohin loran iha ne'ebé sistema hotu-hotu inklui governasaun nian sai dijitalizadu. Ho nune'e, importante ba entidade seguransa liu-liu servisu intelijênsia preziza adapta-an ho realidade mundu dijitalizadu ida ne'e. Liu-tan ho planu *cabo submarino* ne'ebé sei mai preziza mos kondisaun seguransa ba infraestrutura vital refere.

### **Polísia Sientífica Investigasaun Kriminal**

Tuir FM nian monitorizasaun tempu to'o ona ba Governu atu altera *Lei Organização Investigação Criminal* (LOIC) no reforsa fila-fali PNTL iha área investigasaun kriminal. Hanesan FM hakerek ona iha tinan 2022 LOIC ne'e la solusiona polêmika ka rivalidade entre PNTL ho PCIC ne'ebé durante ne'e hamosu diskusaun naruk iha sosiedade Timor-Leste. Razaun prinsipal maka FM haree katak LOIC fó kompetênsia bo'ot liu ba PCIC no hasai tiha kompetênsia sira ne'ebé durante exerse hosi PNTL iha matéria investigasaun kriminal nian. Nune'e mos PNTL bele hala'o deit tuir delegasaun kompetênsia hosi Ministériu Públiku, bainhira iha área jurídiku sira ne'ebé PCIC la existe. Signifika katak PNTL sei konsentra deit ba asuntu sira ordem pública no investigasaun kriminal nu'udar kompetênsia PCIC nian hanesan korpu superior polísia kriminal.

Lei ida ne'e aumenta-tan frajilidade institucional no la fó solusaun ba desenvolvimentu institucional PNTL, kestaun ida ne'ebé pertinente no urjente tebes. Lei foun ne'e la valoriza instituisaun PNTL ne'ebé existe desde Timor-Leste hetan independênsia, no hafraku fali PNTL

---

<sup>11</sup> Programa IX Governu Konstitusional. Asesu iha loran 12 Setembru 2023. Disponivel iha ne'e: <http://timor-leste.gov.tl/wp-content/uploads/2023/07/TT-2023-07-19-Programa-IX-Governo.pdf>

<sup>12</sup> Fundasaun Mahein (2023). Revizaun Kadru Legal Serviço Nacional de Inteligência: Pasu Signifikativu hodi Hametin Profesionalizmu SNI. Asesu iha loran 12 Setembru 2023. Disponivel iha ne'e: <https://www.fundasaunmahein.org/2023/04/19/revizaun-kuadru-legal-servico-nacional-de-inteligencia-pasu-signifikativu-hodi-hametin-profesionalizmu-sni/>



enkuantu haforsa tan PCIC. Tamba ne'e, FM preokupa Lei ida ne'e bele hamosu-tan tensaun no konfliktu entre instituisaun Estadu rua ne'e. Timor-Leste nia experiênsia pasadu hanesan Krize 2006 to'o mai empase política iha 2017-2021, ne'ebé hanorin ita katak konfliktu ka tensaun entre instituisaun seguransa lori risku bo'ot ba estabilidade no seguransa nasional<sup>13</sup>.

FM hakerek barak kona-ba PCIC hanesan modelu polisia ne'ebé kopia hosi Portugal (Polisia Judisiaria iha Ministériu Justisa nia okos) tamba Timor-Leste nia difikuldade no depende ba asesór internasionál sira. Liu-iu wainhira asesór ne'ebé falta konesimentu kona-ba kontekstu Timor-Leste maka esbosu lei sei kontinua *copy-paste* hosi Portugal ho nasaun CPLP sira. Política ka instituisaun ruma kopia deit husi kontekstu seluk no la adaptadu ba kontekstu Timor-Leste bele provoca frajilidade institucional no hafraku prátika sira ne'ebé eziste ona iha terrenu.

Tamba ne'e FM apoiu programa Governu nian kona-ba reforma no kapasita PCIC ne'ebé ba oin sei tutela hosi Komandu PNTL, ho objetivu atu hametin ninia kapasidade ba asoens kona-ba prevensaun, detesaun no investigasaun. Investe iha laboratóriu no ekipamentu sientífiku no kriminais no reforsa formasaun iha área investigasaun kriminal PNTL nian.

### **Ministériu Negósiu Estranjeiru no Kooperasaun**

Dokumentu importante ida liga política externa Timor-Leste nian maka Livru Mutin Política Externa. Tinan 20 ona to'o agora seidauk elabora dokumentu ne'e, nune'e iha tinan 2024 FM sujere ba MNEC tau prioridade ba elaborasaun, produsaun no aprovasaun ba Livru Mutin Política Externa)<sup>14</sup>.

Livru Mutin Política Externa liga mos ho interese estratéjiku Timor-Leste nian iha âmbito kooperasaun bilaterais no integrasaun rejional. Timor-Leste hanesan membru Observador ba ASEAN, FM sujere reforsa no prepara rekursu umanu iha area estratéjiku sira iha pilar ASEAN nian. Nune'e partisipasaun Timor-Leste iha forum sira ASEAN nian bele iha lian, ativu no kontribui foti desizaun estratéjiku sira ne'ebé bele promove Timor-Leste nia interese no benefisiu ba ASEAN tomak.

Númeru timor-oan servisu iha rai liur kontinua aumenta ba bebeik, tamba ne'e protesau ba traballador timor-oan sira iha rai liur tenke sai prioridade bo'ot ne'ebé presiza haforsa regra no servisu diplomátiku Timor-Leste nian iha rai liur. Exemplu importante ida maka iha Portugal hasoru difikuldade oin-oin bainhira timor-oan sai vítima ba atividade krime organizadu no kuaze prezensa Estadu nian la iha hodi fó protesau ba sira. Hanesan mos traballador timor-oan sira iha Reinu Unidu, Canada, Austrália, Coreia do Sul no Japaun, diplomata Timor-Leste tenke

---

<sup>13</sup> Fundasaun Mahein (2022). Kriasaun Lei Organizaun Investigasaun Kriminal La Solusiona Polémika no Rivalidade entre PNTL ho PSIK. Asesu iha loron 20 Setembru 2023 no disponivel iha ne'e: <https://www.fundasaunmahein.org/2022/07/25/kriasaun-lei-organizaun-investigasaun-kriminal-la-solusiona-polemika-no-rivalidade-entre-pntl-ho-psik/>

<sup>14</sup> Programa IX Governu Konstitusional. Asesu iha loron 12 Setembru 2023. Disponivel iha ne'e: <http://timor-leste.gov.tl/wp-content/uploads/2023/07/TT-2023-07-19-Programa-IX-Governo.pdf>

vizível hodi fó protesaun ba sira bainhira sira presiza no hanesan direitu ida ne'ebé garantia hosi Estadu.

Nune'e mos kontinua promove relasaun di'ak ho nasaun viziñu sira hanesan Australia no Indonézia ne'ebe opta prinsipiu komum sira, demokrasia no respeito ba direitus umanus. Hanesan mos parseiru sira Xina, Japaun, Corea do Sul, Estados Unidos Amerika, Uniaun Europeia, ASEAN no *Comunidade dos Países de Língua Portuguesa* (CPLP) kontinua promove nu'udar parseiru estratéjiku hodi apoiu dezenvolvimentu Timor-Leste.

## **Rekomendasaun**

FM rekomena ba Komisaun B Parlamentu Nasional no IX Governu Konstitusional iha tinan 2024 tau prioridade ba asuntu estratéjiku sira iha setor defeza, seguransa no negósiu estranjeiru hanesan elaborasaun, produsaun no aprovasaun ba:

1. Política Seguransa Nasional;
2. Política Defeza Nasional;
3. Livro Mutin Política Externa;
4. Planu Estratéjiku Seguransa Interna
5. Estudu Estratéjiku PNTL.

Parlamentu Nasional halo alterasaun ba LOIC no reforma no kapasita PCIC ne'ebé ba oin sei tutela hosi Komando PNTL, ho objetivu atu hametin ninia kapasidade ba asoens kona-ba prevensaun, detesaun no investigasaun, investe iha laboratóriu no ekipamentu sientífiku no kriminais no reforsa formasaun iha área investigasaun kriminal PNTL nian.

Nune'e mos servisu patrullamentu no informasaun PNTL hodi identifika no prevene hahalok sira ne'ebé potênsia mosu krime. Ikus liu, reforsa servisu intelijênsia, liu-liu rekolla, analiza informasaun no promove intelijênsia sibernética iha Sistema Nasional Intelijênsia.



## Bibliografia

- Jornada Orsamentais tinan 2024. Asesu iha loron 12 Setembru 2023. Disponivel iha: <http://timor-leste.gov.tl/?p=33999&lang=tp>
- Fundasaun Mahein (2023). *Revizaun Kuadru Legal Serviço Nacional de Inteligência: Pasu Signifikativu hodi Hametin Profesionalizmu SNI*. Asesu iha loron 12 Setembru 2023. Disponivel iha ne'e: <https://www.fundasaunmahein.org/2023/04/19/revizaun-kuadru-legal-servico-nacional-de-inteligencia-pasu-signifikativu-hodi-hametin-profesionalizmu-sni/>
- Fundasaun Mahein (2022). *Kriasaun Lei Organizasaun Investigasaun Kriminal La Solusiona Polêmica no Rivalidade entre PNTL ho PSIK*. Asesu iha loron 20 Setembru 2023 no disponivel iha ne'e: <https://www.fundasaunmahein.org/2022/07/25/kriasaun-lei-organizasaun-investigasaun-kriminal-la-solusiona-polemika-no-rivalidade-entre-pntl-ho-psik/>
- Fundasaun Mahein (2017). *Política ba Setor Segurança Seidauk sai Prioridade iha Timor-Leste: rekomendasaun ida ba kandidatu Presidente República no partidu polítiku sira iha Eleisaun Jeral 2017*. Asesu iha loron 29 Setembru 2023. Disponivel iha ne'e: <https://www.fundasaunmahein.org/wp-content/uploads/2017/02/MNL-119-Prioridade-Politika-ba-Setor-Seguransa-022017-PDF-1.pdf>
- Presidencia Konsellu Ministru (2023). *Sorumutuk Konsellu Ministrus nian iha loron 29 fulan-agostu tinan 2023*. Asesu iha loron 12 Setembru 2023 no disponivel iha: <http://timor-leste.gov.tl/?p=33720&lang=tp>
- Programa IX Governu Konstitusional. Asesu iha loron 12 Setembru 2023. Disponivel iha ne'e: <http://timor-leste.gov.tl/wp-content/uploads/2023/07/TT-2023-07-19-Programa-IX-Governo.pdf>
- Relatório Ministério Agricultura no Pesca 2023. Asesu iha loron 2 Outurbo 2023. Dispivel iha ne'e: <https://tatoli.tl/2023/08/25/2018-2021-tl-lakon-ikan-maizmenu-388-1720-tonelada/>